



Komunikadu Imprensa
03 Agostu 2023

Tribunál hahú tama ba feriadu judisiáriu
Autór tribunál sira simu formasaun kona-ba Violénsia Bazeia ba Jéneru

Kada tinan hahú husi 01 Agostu to'o 15 Setembru, Tribunál sira tama ba lora feriadu judisiáriu no sei reativa fali julgamentu iha 16 Setembru 2023. Hanesan bain-bain bainhira tama lora feriadu judisiáriu, autór tribunál sira sempre prenxe tempu ne'e ho formasaun hodi hasa'e tan kapasidade sira nian ba iha lei sira no oinsa trata kazu sira ho di'ak no efetivu.

Iha feriadu tinan ida ne'e (2023), formasaun hahú kedas ba iha defensór públiku no ofisiál justisa sira kona-ba oinsa fó atendimentu no fó protesau di'ak liu ba vítima sira Violénsia Bazeia ba Jéneru (VBJ). Treinamentu ne'e fasilita husi UNDP. Alende ne'e, prokuradór no juis sira sei kontinua tuir formasaun kona-ba asuntu hanesan iha rai liur ne'ebé fasilita husi ADB no Governu.

"JSMP apresia tebes ho autór tribunál sira tanba mantein organiza-an iha lora feriadu hodi partisipa iha formasaun kona-ba asuntu VBJ ne'ebé JSMP konsidera importante tebes tanba liuhusi treinamentu ne'e bele hasa'e sensibilidade autór tribunál nian ba iha kazu sira VBJ nune'e bele garantia qualidade akuzasaun, fó defeza no bainhira foti desizaun ba iha kazu VBJ sira hanesan saida mak JSMP rekomenda durante ne'e," dehan Sra. Ana Paula Marçal, Diretora Ezekutiva JSMP.

Mezmu iha hela período feriadu judisiáriu maibé julgamentu ba kazu sira urjénsia kontinua la'o, hanesan prosesu sumáriu, arguidu prezu no primeiru interogatóriu, kazu sivíl mak providénsia kautelár inklui mós ba prosesu kontinuaun sira atu nune'e la lakon nia efikásia. Autór tribunál sira (juis, prokuradór no defensór inklui ofisiál justisa) ne'ebé turnu kontinua serbisu hodi atende prosesu urjente sira. Enkuantu ba ofisiál justisa ne'ebé foin toma pose sei la hetan direitu atu feriadu no sei nafatin tama serbisu hodi kontinua atende kazu urjente sira. Ho nune'e, sei la fó implikasaun ba direitu arguidu/a no lezadu/a sira nian atu hetan justisa.

JSMP espera katak depoisde filafali husi feriadu ida ne'e, autór tribunál sira iha espíritu foun hodi kontinua hala'o sira nia serbisu atu garantia justisa ne'ebé justu ba iha parte sira ne'ebé buka justisa.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl